

8. Scola e scolasts da Cavorgia

Cavorgia schai pulitamein giud via da Sedrun e quei sto esser stau il motiv dil vischinadi da sez erreger ina scola. Els ein stai piuniers ed han eregiu lur scola igl onn 1848, sco emprems ella val ensemen cun Sedrun.

Ils 20 da schaner 1840 scriva igl «Ordinariats-Officium» da Cuera:

Tavetsch an Herrn Decan und Pfarrer Joseph Hitz: Auf das geziemende Ansuchen Namens der Einwohner des dortigen Filialhofes Cavorgia, es möchte demselben ein kleiner Beitrag aus dortiger vermöglichen Kapelle S. Lucii zur Haltung einer eigenen, wegen dem weiten und oft lebensgefährlichen Wege zur allgemeinen Pfarrschule, fast unentbehrlichen Hofschule bewilligt werden, erlaubt das Ordinariat, dass alljährlich ein Beitrag von fl. 20 aus benannter, dortigen Kapelle als Salarium eines Lehrers verabfolgt werden können gegen dem, dass

- 1. die Einwohner für die Nahrung des Lehrers selbst sorgen möchten,*
- 2. alle Kinder zur Schule, und allen Eltern derselben zum Unterhalt des Lehrers pro rata verpflichtet seien, dass*
- 3. Lehrer und Schule unter die Aufsicht des Pfarrers gestellt seien, und dass letzterer befugt sei, sowohl Materialien als Personalien der Schule zu entfernen, wenn sie den guten Sitten, oder der Reinheit der katholischen Lehre gefährlich werden sollten, endlich*
- 4. dass diese Bewilligung auf zehn Jahre beschränkt sei, indem man erwartet, dass bis dorthin andere Hilfsquellen für diese Schule ausfindig gemacht werden können.*

Chur, am 20. Jänner 1840

Das Ordinariat-Officium für Selbes Jac. Fr. Riesch, Cancellier.

(Archiv communal Tujetsch)

Ina interessanta notizia cumparida ella pressa romontscha, en igl Amitg dil Pievel (I) 1841, nr. 50. secloma:

"Cavorgia in hof da paucas casas en Tujetsch duei haver concludiu da baghegiar ina casa da scola. In exempel che mereta imitaziun. Contas grondas vischnauncas dat ei, nua ch'ins ha negina casa da scola."

(Amitg dil Pievel (I) 1841, nr. 50)

Igl onn 1848 vegn la casa da scola erigida. El contract dils 3 d'avrel 1848 davart il baghegiar la scola a Cavorgia stat ei scret:

Ei daventau in Contract denter la Comissiun de Scola dina wart e maister Gion Antoni Schmedt de lautra wart, maister Gion Antoni Schmedt surpren da baghegiar ina Casa de Scola a Cavorgia en largezia denter las Preits 10 ½ bratscha en largezia de mintga maun, che duei vignir faitg ina Stiva, in Stebli de trei e miez Bratscha e la Stiva 7 bratscha sin mintga maun, con aung ina Combra el Giebel, deigi lura vigniu mess si Isiarhels e Canals e tablegiau las Grundas sin tuts mauns sut si. La stiva e stebli deigien ristar l'altezia de 13 quartas. Perquella lavur paga la Comissiun al detg Schmedt in Capital de 85 fl digiel oitgiontatschun Risculdis, e dus Thalers remess. Il Capital veing pagaus duas tiazas sin Datun proxim, et ina tiarza deigi vignir dau empau pli liung tems, nonessent el Cass de saver pagar tut. Il maister ei lura obligaus de far la Lavur sco ei auda. La Lenna deigi vignir dulada sco quella dil Mucli ei stada dulada.

Tujetsch ils 3 de Avrel 1848.

*Joseph Ant. Durgiai, Farrer
Johann Jacob Beer, Actuar*

(Archiv communal Tujetsch)

Era per il pinar ora e mobiliar la scola ei stau fatg in contract.

Tujetsch, ils 23 de Avrel 1849, eis ei daventau il sequent Accort de lavur denter Sigr. Lucas Caveng e Sigr. scarvon Monn en Num della Comissiuin de Scola e Meister Gion Antoni Schmed a risquart il pinar ora la Casa de Scola de Cavorgia et ei sco suonda:

1mo Sto il Meister Gion Antoni far ella maldigiada Casa dus Plentschius perdius en Stiva e Stebli castrai, e dus surengiu, dapli dus suren en il madem Stebli e Stiva. Item on cuschina in plentschiusuten daven dilg Esch casa entochen dadens ilg Esch Stiva, e suren avon Combra era il madem, sco era il plentschiusura della Combra dilg Giebel.

2do In esch casa fatergiu, dus Eschs cun tablas sin la Stiva e Stebli et in cun arigels sin la Combra. Tuts quels Eschs sto el anferar e meter si.

3tio Ina Scalla per ira sin Combra, e far oitg barcuns e quels anferar e meter si els, item tabliar entuorn la pegnia e far ina fanastrel sut quella en.

4to Supias entuor la Stiva daven din Esch entochen lauter et era ina meisa, della Stiva liunga. Sco era ina supia de quella lungezia. En Stebli in letg et ina meisa ordinaria e duas supias pintgias cun artg. Fus ei era aung de basegns de meter en ischenchels sehe eis el era tier quei obligaus.

Tut quella Lavur sto lura esser buna e solida. Per quella lavur paga la Comissiuin de Scola, f 55 dico tschunconta tschun renschs, sin ilg atun proxim de quest onn. Duess aber la lavur per munchonza dellas aissas buca saver vegnir fatgia entira en quest onn, sehe veng il pagamen faitgs mo suenter della proportiun della lavur.

Per confirmaziun dilg Sura suttascrivien las parts contrahentas. Il Meister Gion Antoni Schmed, nunsavent scriver fa si sia Noda Casa.

Lucas Cavegn

sco Comissionau de quella vard

(Archiv communal Tujetsch)

Davart quella casa scriva Giusep Steiner:

Baghegiada eis ella sin ina muota da grep, pressapauc mesavia denter las casas dil vitg Cavorgia e quellas dil Plaun s.Leci. Ella ha negin tschaler, mobein ina stiva, in stebli cun ina combretta el giebel. La cuschina ei buca spartida si, e vegn duront 10-12 seras igl atun squitschau ora ieli da semglin en quella cuschina. Grond disturbi pil scolast quellas notgs ... Jeu vevel ils scolars dils davos onns che vevan tut lur geniturs ch'eran stai a scola tier mei. (Ord las notizias da Josef Steiner. Quei scolast ei staus in original e schizun poet.)

Sco ei para vevan ins era empruau in onn da metter si scola a Surrein.

Sur Giachen Antoni Monn, nativ da Sedrun, naschius 1829, ha da giuven, forsa da student, fatg scola a Surrein en casa giudem da Luis Curschellas; denton probabel buca ditg. El ei morts 1872 sco caplon da Laax.

(Notizia da pader Baseli Berther)

Cavorgia haveva gia giu avon scola, zanza en ina casa privata. Sco emprem scolast en la nova scola han ins elegiu il giuven Leci Antoni Balzart per 45.- frs. Anflar scolast era per cavorgia buca sempel e quei ha cuzzau atras tut ils onns d'na scola. Biaga ha ei dau nuot auter che d'anflar cumpromiss, magari cun ira a Sedrun, ni ils davos onns cu la scola ei vegnida menada cun agid da seminarists. Gia 1850 scriva inspectur Placi Condrau:

Per buca schar pli ditg la scola da Cavorgia orfonila haiel jeu cun consentiment digl emprem gerau (en riguard la paga) e cun cussegl dil signur Janer (en riguard il personal) pladiu leu in

scolast sut las condiziuns sco onn. Il cussegl d'educaziun vegn tenor empermischun a schar vegnir tier ad el in susteniment de 40.- fr.

(Archiv communal Tujetsch)

Ils 7 da zercladur 1880 scriva il departament d'educaziun al cussegl da scola dalla vischnaunca da Tujetsch:

Aus den statistischen Tabellen des Schulinspektorates Kath. Oberland haben wir entnommen, dass der Lehrer der Schule in Cavorgia im letzten Schulwinter folgende Belohnung erhielt:

f 200 baar

f 100 in Naturalien

f 40 Wohnung und Holz

Sie werden hiemit eingeladen, sich beförderlichst unser vernehmen zu lassen, in was die Naturalien bestanden und wie dieselben gewerthet worden sind.

Der Vice-Präsident F. Manatschal

(Archiv communal Tujetsch)

Il pagar ils scolasts ina part cun naturalias era usitau era en autras scolas. Mo scriva il departament d'educaziun en in auter liug, ch'el seigi buca absolutamein encunter il pagar ils scolasts sin quella moda, stoppi denton pretender che quellas naturalias vegnien surdadas dil cussegl da scola al scolast, sinaquei ch'il scolast seigi buca necessitau d'ir sez casa per casa per quellas.

La casa da scola a Cavorgia

da Cecilia Hendry-Schmid, Cavorgia

Aschi anavos sco jeu seregordel ha la casa sil grep sper la via denter la part sura digl uclaun da Cavorgia e la part sut, il Plaun s.Leci, surviu sco casa da scola. Jeu mezza hai frequentau mes onns da scola en quella digl october 1929 tochen igl avrel 1938.

La semplia casa da duas alzadas fuvava tablegiada ordadora cun slondas. Damai ch'ella era tschentada sil grep havev'ei negin tschaler. Atras in ferm esch-casa vegnev'ins en in pierti aschi grond sco circa ina tiarza dalla mesira dil plaun terren. Seniester steva ina scala per ir en l'alzada sura cun ina combra. Si cheu fuvava tut il material vegl e buca duvreivel. Dretg el pierti fuvava l'entrada per la stiva da scola. Gest speras era il tgamin cun la bucca pegna e davostier ina furnascha da mir per cuschinar. Las preits e plantschiu sura fuvan stgir-brinas dil fem.

En quei pierti sesanflava da lezs onns in spezial indrez per struclar ora ieli semglin. Sper la preit entadem il pierti fuvava baghegiu si cun fermes quaders igl indrez per il torchel da smaccar. Gliez vegneva fatg cun dar aigra cun in liung e ferm quader lenn. Quei quader da circa quater meters steva tut ils onns per liung dil pierti entochen ch'ins ha entuorn 1950 dismiss tut quei uorden. Ina finiastra entadem il pierti deva empau glisch.



La stiva fuvava biars onns partida si en dus locals. Ord munconza da scolars ha ina famiglia viviu in cuort temps en casa da scola. Els onns ch'ei ha puspei dau scolars han ins fatg ordlunder mo ina stanza, fatg novs plantschiu e tablegiu tut cun tablegiu-table e fatg finiastras novas da treis varts.

La stanza fuva clara ed emperneivla. Sco decoraziun fuva mo in sulet maletg ed il crucifix. Sin ina preit pendevan duas cartas da geografia, ina dalla Svizra ed ina dil Grischun. Vid l'otra pendevan duas tablas da scriver, ina cun lingias, ina senza. Duas crunas vid la preit fuvan per metter si nos carnets da bi. Cul niev cudisch da tudestg ei vegnius daus a nus, havein survegniu in maletg da preit d'instrucziun. Pli tard ha enzatgi schenghegiu alla scola ina copia d'in maletg da Aluis Carigiet, la «vacca verda».

Il mobiliar da nossa stiva da scola fuva mudests. En in cantun ina meisa ed ina suppia cun pusal, plinavon in sempel pult per il scolast ed 8 – 9 bauns da scola. Dus da quels bauns havevan dus plazs, ils auters treis plazs. Miez la meisa dil baun savev'ins volver si e davon il baun giu savevan ins tschentar giu la tabla da scriver da crap. Sut il plat dil baun haveva mintga scolar ina crunetta per sias caussas. Sin il suttapeis da gliestas savevan nus tener nos peis e schar luar la neiv giud nos calziers enguttai. Ils bauns eran magari bass, ils affons pli gronds havevan breigia da stender la membra. Ina gronda e buna pegna deva cauld a l'entira stanza. Il cauvitg ni in'otra persuna scaldava mintga damaun marvegl la pegna. Vid il plantschiu sura pendeva tochen 1957 ina ampla da petroli. Sch'ei fuva la damaun allas otg buca clar avunda, sche deva quella in tec clarezia, ni la sera sch'il scolast haveva aunc lavurs. Ina spina dad aua dev'ei era buca en casa. In scolar stueva ir per aua da lavar las tablas ord il begl sper il dutg. Avon casa fuva in laupiet, entadem quel in camberlet cun cumah schetg.

Nos onns da scola a Cavorgia

da Cecilia Hendry-Schmid, Cavorgia

Ils onns da mia affonza fuvan nus ina roschada affons el vitg da Cavorgia. Aschia fuva la stiva en casa da scola sil grep sper la via, duront biars onns emplenida bein cun scolars. En quella casa che stat aunc oz denter il Plaun ed enasi Cavorgia, sun jeu ida otg unviarns a scola. Nus fuvan vegn e dapli scolars en otg classas e mo in scolast. Uras da scola eran adina navenda las otg dalla damaun entochen las endisch cun ina pausa d'in quart ura. E lu da l'ina tochen las quater. Per tut las classas adina quei temps e la sonda suentermeizdi liber. La mesjamna suentermiezdi havevan ils buobs gimnastica ni schiglioc ina occupaziun ordaviert cul scolast. Las buobas havevan lu scola da lavurs manilas, cuser e far caltschiel. Ina ga ad jamna deva il caplon da Sedrun ducrina per in'ura e mesa a tuts scolars.

Suenter l'oraziun la damaun deva il scolast a mintga classa siu pensum da lavur. Per tuts, priu ora l'emprema, fuva ei ualti adina da far quen a scret entochen la pausa da mesa las diesch.

L'emprema haveva d'emprender las cefras ed ils emprems quens. Denteren haveva scadina classa dapersei quen a tgau, negin vegneva da mitschar orasut.

Suenter la pausa, che era il scolast haveva veramein da basegns, mava nies studi vinavon. Las classas aultas, navenda la quarta tochen la tschunavla, survegnevan ils penusm per emprender tudestg. Quei deva a bein enqual da semudergiar, principalmein cun la grammatica, declinaziuns e

verbs. Las classas cun pensums romontschs, leger e grammatica romontscha en leger e scriver fuvan bein occupadas. Avon las endisch vegneva scadin aunc vidlunder da mussar ils pensums fatgs a casa. Leds ch'ei deva prest il gentar mavan nus casa. Memia spert fuva ei l'ina e pauper quel che vegneva memia tard, per lez dev'ei in «strof», scriver giu a casa.

Suenter l'oraziun deva ils scolast a mintga classa siu pensum da far per tudestg u romontsch en scret. Quei fuvan concepts, geografia, historia dalla patria e historia naturala. Denteren vegnevan certs roms pri atras a tgau. Il scolast ch'ei staus en mes onns da scola deva bia peisa sin grammatica en romontsch e tudestg. Il cudisch da grammatica da pader Ursicin Simeon cun las colonnas da verbs regulars e irregulars,



conjugaziuns e declinaziuns, savev'ins la fin dalla scola bunamein ordadora. Era ils scriver bein e schuber fuva lu impurtont.

Cun ils scolars dallas empremas treis classas stuev' il scolast far bia exerchezis a bucca. Perquei regeva gronda disciplina en scola. Mintgin stueva emprender da seconcentrar sin sia lavur e buca disturbar il vischin. Il scolast fuva attents e fageva endamen las consequenzas. Cant havevan nus buca cun regla, denton emprender poesias e da raquintar ualti savens.

Tut material da scola, per mintga classa siu cudisch da leger e quel da far quens e cudischs da tudestg, stuevan ils geniturs pagar. Perquei artavan nus adina quels denter fargliuns. Aschia vesevan ils cudischs ora cul temps ualti mal. Da mes onns da scola havein nus duvrau la tabla da platta morta ed il greffel da crap tochen la davosa classa. Suenter las correcturas scrivevan nus in ton dils pensums en in carnet. En ils carnets scrivevan nus cun plemas da metal e tenta. Da temps en temps scrivevan nus certs pensums en tuts roms en il carnet da bi. E quei per saver tschentar ora quels sin ina meisa, cura ch' ils geniturs vegnevan sin viseta duas ga per unviern. Igl inspectur visitava nus duas ga per onn.

Ils emprems treis onns sun stada a scola tier miu aug Gion Antoni Schmed che fuva sils onns. Ina ga ha el per in motiv che jeu sai buca pli, dau a mi ina tazza cun la lingiala sin miu maun aviert ora. Quei ha fatg aschi mal che jeu hai fatg il propiest da mai dar caschun pli per in tal castitg. In onn havein giu in scolast da Trun gest ord il seminari che ha giu pouca pazienza e dau fridas a bein enqual scolar. Ils davos quater onns havein giu in scolast els megliers onns. Quel haveva buna disciplina en scola ed era buns sco in bab. Quel procurava che nus survegnevan mintga atun enzaconts haras meila e parteva ora a mintga affon per purtar a casa. Sin Nadal mussava el a nus in giug e canzuns ed envidava en ils geniturs. Inaga haveva el perfin rimnau resti per ils affons e partiu ora. Tut che haveva giu grond plascher, ils geniturs ed affons. Nus havevan aunc mai enconuschiu tals benefactors.

Tier quei scolast sun stada ils davos quater onns. Nus fuvan lu entuorn 22 scolars. Ei haveva num star cul tgau tier la lavur e mirar mintgin da siu pensum. Jeu seregordel ch'ei regeva quietezia duront ch' il scolast fageva la runda entuorn ils 7 – 8 bauns da scola. Ins udeva mo il sgarflem dil greffel da scriver sin la tabla e mintgaton ina pitgada da nos calzers enferrai cun guotas. En las davosas classas dev'ei da suar cun igl emprender tudestg a bucca ed a scret. Nossas lecziuns da scola fuvan en las davosas classas pli e pli bia en tudestg. Aschia era il far quen, che era per nus grevs, muort las cefras zanistradas dil tudestg. Auters roms sco geografia e historia ed auter empredevan nus adina sin romontsch. Exercezi da cant havevan nus mo inaga ad jamna circa mes'ura.

Essend nus a Cavorgia mo 2 – 3 scolars per classa, vegnev'ins mai suto en pensums a bucca. Nossas cameratas en la scola a Sedrun, cun partida affons per classa, raquintavan a nus da lur saver sefugir dallas damondas dil scolast.

Pensums a casa en quens ed auter survegnevan nus mintgadi cun paucas excepziuns, sco da Sontgaclau e Nadal. In miezdi il tscheiver raquintava il scolast en scola praulas ni ch'ins deva giugs. Inaga astgavan nus ira cul scolast a mirar teater ni a mirar in film mét a Sedrun.

Il di da fiera sogn Martin havevan nus liber. Ils buobs astgavan catschar ils tiers cul bab ensemen dallas Cavorgias oiragiu tochen a Mustér e lu turnar la sera a pei a casa. In brav strapaz! Fuva la raccolta da truffels en retard, survegnevan ils scolars magari liber per gidar ils geniturs, sco era per gidar a scuder.

•••

Cugl onn da scola 1967/68 ha la scola dil vischinadi da Cavorgia pegliau sia fin. Varga tschien onns ha quella casetta sil grep surviu sco scola e per l'instrucziun dils affons da Cavorgia. Silsuenten han ils affons da Cavorgia stuiu serender a Sedrun. (a pei/cu bus)

Igl onn venda la vischnaunca la casa. Quella vegn midada en ina casa da vacanzas.

Ils scolasts e las scolastas

Cavorgia ha giu el decuors dil temps ils suandonts scolasts:

- Avon 1855: Muggli da Cavorgia
Stiafan Beer, in onn
Duri Riedi da Rueras
Hermarina Fazendin da Danis
Gion Antoni Soliva da Sedrun
Sigisbert Monn da Mustér
Genal da Surrein-Sumvitg
- 1856-1862 Giusep Anton Steiner da Cumpadials, cun ina paga da 100.- frs. per onn.
1862-1872 ston ils affons da Cavorgia, essend zun paucs, ira si Sedrun a scola.
1872-1874 3 onns ha Giusep Antoni Steiner dau scola a Surrein/Tujetsch, en casa da Giger per
ils affons da Surrein e Cavorgia, essend ils biars da Surrein. Paga 100.- frs.
1876-1884 8 onns ha Giusep Steiner puspei dau scola a Cavorgia ed haveva retschert ils davos
onns entras beinvulientscha digl inspectur Disch la patentia d'admissiun.
1884-1894 ein ils affons da Cavorgia i a scola a Sedrun.
1894-1896 Adalbert Schuoler, Cumpadials
1898-1901 Onna Maria Caplazi, Surrein-Sumvitg
1901-1916 ein ils da Cavorgia puspei vegni a Sedrun a scola; la vischnaunca pagava in ton per
affon.
1916-1917 Giachen Fidel Berther da Rueras (La primavera 1916 ha el stuiu ir schuldau; per el
ha scolast Albin da Breil gidau ora a Cavorgia e finiu igl onn scolastic.)
1917-1920 Giachen Fidel Berther da Rueras
1920-1925 Silvester Simeon da Lonsch
1925-1928 Tumaisch Venzin da Sedrun
1928-1933 Gion Antoni Schmed da Cavorgia
1933-1934 Serafin Bundi, Trun
1934-1939 Gieli Cavegn, Breil
1939-1945 Teofil Schmed-Valier, Sedrun
1945-1946 Vigeli Berther, Camischolas
1946-1947 Rest Gieri Walder, Sevgein
1947-1950 Leci Jacomet, Sedrun
1950-1951 Carli Job, Trun
1951-1953 Albert Berther, Buretsch-Mustér
1953-1955 Rest Antoni Friberg, Danis. Morts duront il temps da scola.
Gion Giachen Steier, Lonsch
1955-1956 Jacob Baselgia, Lonsch
1956-1957 Curdin Cathomen, Breil (seminarist)
Mario Gadola, Mustér (seminarist)
1957-1959 Vigeli Venzin, Sedrun
1959-1960 Elsi Capeder, Pitasch (seminarista)
Lothar Bearth, Rabiun (seminarist)
1960-1962 Tina Schatz-Cavegn, Cazis
1962-1963 Baseli Berther, Rueras (seminarist)
Julius Bucholzer, Rueun (seminarist)
1963-1964 Giusep Camenisch, Surrein/Sumvitg
1964-1965 Gion Antoni Derungs, Surcasti (seminarist)
Norbert Vinzens, Trun (seminarist)
1965-1966 Norbert Vinzens, Trun
1966-1967 Flurin Tschuor, Sumvitg

1967-1968 Clara Deplazes, Rabius (seminarista)
Rico Casanova, Mustér (seminarist)

Scola da lavur

1921/22 Barbara Capeder, Zarcuns



**Scolast Teofil Schmid-Valier
sin skis cun dus scolars**

Il davos onn ein ils sequents scolars e scolaras aunc stai a scola a Cavorgia:

Hendry Justina	8. classa
Hendry Ida	8. classa
Hendry Cecilia	7. classa
Hendry Tresa	6. classa
Hendry Guido	3. classa
Schmid Ervin	3. classa
Peder Pia	3. classa
Peder Giusep	2. classa
Monn Cornelia	2. classa
Monn Rosmaria	1. classa
Peder Beatrix	1. classa
Schmid Jovita	1. classa